

## TESTAMENT DE L'OM SALVARECH 2022

Se vestis le zariesere - col so bel manto bianchin  
inte n atimo le se despoia - col cantà dei lugherin

Destirea le zate en tas - tut invern el se à pausà  
el insognea del sorc - che el avarae sbafà l'istà

Se delega i candelot - sponta el sol drio la Forzela  
toca lustrà polito i stivai - e montà su svelto in sela.

L'è tut che busighea - quant bramosa che la è la Natura  
la è bona de fa spontà en fior - anca su la tera pì dura

E mi è sentù proprio dainte - na gran forza che me sgorlea  
ustu che l'è la vita che rinas - la me tera la me ciamea

M'è scampà na ridada tra i laore - dopo meis de magon  
come se poselo serà via - un che vif a sbrindolon?

Me sentie come fiadigole - che sciochetea su le me cane  
l'è ora! Son levà in pie - me son mes inte scarsela le lagne.

E alora a gran reclam - de tornà me son parà la voia  
ma son cosita emozionà - che me sgorla tuta la foia!

1

L'è dòì ani che son mut - gnanca n sbuf o na fiatada  
ancui tute ve le scuode - vedarè che gran pelada.

Parea quasi che inte sto periodo - ve fusiesi anca redenti  
tuti boni andoi adoranti - o bele madone penitenti;

una pedo de Bertoldo - ve siè descrucoladi a fà  
ma no podiè stà en cin chieti - senza tant ve lambricà?

A febraro del doimilievinti - i avea pena scoà el Carneval  
co no è vist pì nisuni me son dit - "Po'... a li tramudà La Val?"

Ah! Che maledeta pas - sonea sol le campane e auter nia  
m'è fat anca marevea - no girea gnanca i preive per la forania.

No se incrosea pì gnanca en can - è proà anca inte per le Pile  
ma è vist che eraiè tuti binadi - elo nasù calche pupo inte le vile?

Co la storia po' che se podea - visitase sol tra congiunti  
eraiè tuti diventadi esperti - a fave categole inte i meio punti!

No ste fame di ste pazonarie - che son en om de grant onor  
perde tuta a la me sudizion - a di chel che no ocor!

Ve spiootee inte le cusine - tut en pulverum de farine e dolceti  
ancora en cin che produciè - tochea serà el forno el Toneti!

E po' a n zerto momento - l'è spontà arcobaleni su le teraze  
ma ndieo inmancol a laorà - o no saviè pì come stracà piazze?

Cande po' che m'è inascort - che ocorea se mascherà  
inprim chela de I Basadone - olee quasi me sturtà

Ma co ben è capì - che le podea ese solche omologate  
me son mes la FFP2 - ma la me tirea le recie come patate

E po' nia gnanca pì chela - manca solche chela antigas  
ades tire do en sacramento - che fà tremà anca i sas

Parea quasi de ese rivadi - se avion tirà da bon port  
e invezze nia sion semper de chela - cala saralo la nosa sort?

Proprio parché sion vers la me fin - le ultime ve le dighe  
no ste inmulave, me racomande, - contarè sol de gran fadighe!

Tocarè en cin qua e n cin là - senza pende inte le coste  
e chi che sentirà mal - el se metarà su doi suposte

Co i fà riunion inte I Comun - l'è tut en gran predicà  
fon chesto, fon che l'auter - ma nia no el vien inprontà

L'è la solita miscela - e co l'è ora de se mete in moto  
i riva semper al temp - de tirà fora el capoto!

Mi scoutè con atenzion - tut chel che i dis inte Palaz Dal  
slonghe le rece e sè perfin - cal pez che i ciolarà per Nadal

Toca dilo: puochi "lampi di idee" - ma ombre, invezze, tante  
no capise come mai - da la Capital rive semper manco contante.

Proon a domandà do a Venezia - per avè en cin de fondi  
parché qua da noi no i riva - gnanca se sion moribondi!

Ben, ma no avè badà - che anca Zaia el à reclamà de mi  
el à scrit su Feisbuc - de la me festa che dura trei dì!

Mi no s'è chi che ghe à dit - son lusigà, eh, ghe mancarie  
par che baste en cin de furbizia - e sì anca en zoc el ghe la farie.

I vedè anca voiauter - che da su in caf a do sul cul  
l'è na mucia de laori - ma a bilancio nia, semper nul;

Saveo chel che me fà pì rabia - l'è savè le robe a mesa compida  
no sarae meio ese tuti informadi prima - e no co la è pena fenida.

È da smetela co sta manfrina - che l'Aministrazion no la fa mai nia  
bademo come che i se à spendù - per el legnam da portà via:

Inte a Le Vize - camion e impresari de le concesioi  
invezze inte per Piar - la gavada la incucea le procesioi

Gh'à tocà dase da fà - e sverde fora inmancol na corsia  
prim che co na meda brentana - i se catese tut sboà via

Ma i problemi de largheza - i taca ben prima, fora ai Ranci  
per no sbaiase i à batù via i cantoi - così se pasa tuti quanti!

Ma ringrazielo sto Comun - che i ve à fat anca el laoro  
è fin sentù privati che disea - che el so legnam l'era de oro;

L'unico che ghen guadagna - l'è el bostrico e a piene mani!  
Se asè le piante sbrasade - per no sé che ani!

E che spropositi che è sentù - sion rivadi fin in Oriente  
el bosch de Laderon in Cina - i lo fà diventà stuzzicante

E invece de marcià avanti - tut l'Agordin concorde  
sion stati boni de se svende - e senza gnanca morde

E no ste fà tant i risoluti - a scoutame co la boca verta  
se gnaca così no i le capis - allora i lecarà merda!

Ades no stè pensà - de scampave altre sciafe sul cul  
parché ghen è ancora da dive - tornè pur a impiantà el mul.

Saveo me nas na domanda - dreta e sceta da la boca  
ma la dent caminela co i oci verti - o co la vista en cin fioca?

E qua de dì valch - me sà tant che olsarè:  
per pasà via le acque - ocoraralo ciamà Mosè?

L'è n gran toc de temp - che no cambia le situazioi  
co le ora de traversali - l'è meio dì su doi orazioi

Aveo vist o sone mi che me insogne - come eli i pont ridoti?  
per comedali no bastano doi breighe - ma gnanca quatro ceroti!

Ma elo da ciamà na grazia - co se balega el pont inte a l'Arca?  
Oramai la sponda inte boion - la sarà anca ndata marza.

E sul pont de Fades - se te balega con en cin de penta  
te sent tut che tremolea - par na vecia co la se senta!

E su per la riva dei Sone? - Speteli che la gran creanza?  
L'è el mur che toca inte strada - alo da crese le tete soura la panza?

Me par anca de avè intendù - che no i à pì posto in piazza  
e allora i vol fà i parcheggi sot tera - o a sbalz su na teraza.

Ma pason al pont pì grant - dopo el stret dei Toneti  
l'è pasà no sé che ani - da co i è ndati fora dreti

Per no rivà dò sul sgrasol - i ha metù en "niu gersi" de cemento  
ghen vede en cin d'apartut - sarà la nuova moda arredamento

Me pareva puoc laoro - le spalete o en cin de strop  
i olarà fa tut in grant - e lasane sbasidi come pop

Come cande che i ha metù - el pont a uso pedonal  
gran progetti e tanti schei - per pasà via na val

Quanta cativeria che è sentù - per chel pont stort de legn  
toca ceniselo ancora bon - parchè l'è l'unico che cen!

E po' i vol anca dopralo - de ripiego come strada  
m'è savù n gran braura - o solche na gran cantada

A ciapala en cin de penta - se fà en giro via sui Coi  
o se fenis inte la brenta - a bagnase i comedoi

E rodolando come en sas - che el vol rivà a Venezia  
pena dopo te ghen cata n'altro - che no l pol pasà da inezia

Se te sè de qua de l'acqua - e te vol ciapate el trili  
toca proa a tentà lo sbarco - come Garibaldi co i Mili!

Se slonga la lista dei pont - che se dis "non pervenuti"  
oleo vede che tocarà dontali - su el Monumento ai caduti?

Se po' per rivà a La Val - te ol fà el giro per la Basa  
stà su ben co le rece - se te ha en camion no te pasa

Da che che i se à impegnà - su per Cal de Gaidon  
i à pensà do a le Ronche - de tacà su en tabelon

Ma l'è meio che i lo sgrande - o i lo mete colore dal  
parché per vedelo e liedelo - ocorarie el canocial

E visto che sion drio descore - de chele bele šone  
ma el pont del Felice - elo content solche de nome?

L'è stat serà en gran toc - parché segnalà come pericoloso  
ma no l'è sol el "mancato transito" - el fato pì scandaloso

Fatalità intant sti ultimi dì - camion e pachere à impizà i motor  
Elo per caso che del me Testament - i avea senti l'odor?

Se me la fè cosí sot el nas - par che trae la fantia  
ma con doi ani de arretrato - no podee no ve dí nia

Ma tornando a el pont Content - tochea fà zento giri  
e allora ghen à approfità - chi che porta a spaso el "tiri"!

Che se sturtea su le cache - armadi de sachet  
a giudicà da l'estro però - ghen e stat asej puochet

Tochea fa le ginkane - a schivà merde de can  
no l'è mai colpa de le bestie - se el paron l'è en zarlatan

Stesa storia da Gisia - a ndà su per Cal da Spin  
na not è metù inte i pie - e me n son portà a casa en cin

E a proposito de degrado - ma l'ecocentro del Comun  
alo vert na succursal - o lo alo tramudà calchidun?

È butà n'ocio l'auter dì - co ndee su per la riva dei Nanori  
elo che inte per le Roe - i à tacà no sè che laori?

Travi veci, casoi de material - asà tut a stramanon  
l'è una incuria da vergognase - proe a dì che no è reson

Che se è capì da onde che l part - me vien el pel su dret  
l'è i pupi che à inventà el duoc - chi ruma cata oset!

Cambion subito la menada - e parlon de valc de bel  
è savù che la nosa scuola - la à cambià maestri e bidel

Le elementari su a La Val - le n' à semper portà gran lustro  
e ades co sti nuovi maestrin - i pupi i ciapa ancora pì gusto

L'è da daghe gran importanza - ai boce che cor inte salon  
en doman da chele bot piciole - vegnarà fora valc de bon

E su l anda de sto bel pensier - oi recordave n' altra fortuna  
chi che verz botega ogni matina - per cenine valc quasù auna

L'è inutile che vel die - la panza piena la vè a impigrì  
no siè boni de vardà pì in là - de onde che sfioris el dì

Mi si che sè polito - chel che me suziedarà fra puoc  
na vampa, doi scotanele - e le me lagne le ndarà col fuoc

Voiauter podè crese e mudà - come inte el bosch i ram  
no stè ese scuz - o tacadi su a pendolon come i salam

Doprè la testa e godeve la vita - che l'è n momento serà i oci  
come la Giova e anca el Pino - è saludà n auter dei me soci

Barba Neri, co le to man - te à creà tanta beleza  
coi pensier per i noni - te i impienia de alegreza

E de mi? Me tochelo dì che - con tuta la to fantasia  
te me fea el soriso, i oci furbi - te me dea fisionomia!

Co rive vers sta ora - me sente semper el cuor che pesa  
e da sto an ancora de pì - no me pias come che trà la mesa.

Le guere i le fa - chi che à schei e come che i vol lori  
mi pose anca portà en sciop - ma da le cane nas solche fiori.

Da sta outa è descorest - nia del sacro e sol del profan  
ma l'è meio che i tire su le recie - batarè dopio el prosim an!

E ades basta, bruseme!! - È dit tut chel che ocor  
ste securi che mi torne - se ghe piaserà al Signor.